

Timor-Leste no kompleksidade Paises Sub-dezenvolidu

Antero Benedito da Silva¹ ho Mario da Silva Carvalho²

Timor-Leste lista ona nudar Nasaun Sub-dezenvolidu (LDCs) ida, no liu husi LDCs Watch Nepal, Organizaun Sossiedade Sivil (CSOs) inkluidu universitariu Timor nian foin dadaun mak komesa involvian iha kestaun ne'e hahu tinan 2008. Artigu ida ne'e antigamente Peace and Conflict Studies Institute-UNTL no FONGTIL hatoo ba Forum LDCs nian iha Kuartel Regional ONU nian iha Bangkok fulan Outobru 2010, ne'ebe diskuti kestaun ruma konaba progresu no regresu dezenvolvimentu besik tinan sanulu resin ne'e iha Timor-Leste. Ba dahuluk ami hakarak foti kestaun basiku sira relasiona ho LDCs nia indikador dezenvolvimentu; segundu, ami sei lori ba diskusaun istoria suksesu no desafios hodi bele realiza objektivu dezenvolvimentu sira ne'e balun inkluidu sira balun ne'ebe iha Objektivu Dezenvolvimentu Mileniu nian (MDGs), no sei kontinua ho diskusaun badak ida kona evolusaun Organizaun Nao Governamentais (ONGs) iha RDTL antes remata ho perspektivu ruma kona nasaun RDTL nia diresaun sei posivelmente ba los iha ne'ebe.

Indikador Dezenvolvimentu no BPoA

Nu'dar nasaun foun, ho populasaun joven total 1.2 millaun, RDTL sai banati-nain ida (a follower), karik laos banati nain diak ida, ba ideas dominante sira, praktikas modelu dezenvolvimentu oi-oin no sira nia indikador. Historikamente, paises sub-dezenvolidu sira (LDCs) mosu nu'dar produktu husi relasaun disegual sira nian ho nasaun sira famouzu ho naran *dezenvolidu* iha parte norte planeta nee. Ba ami atu bele komprende kestaun barak LDCs nian, ami klaramente sei hetan tulun liu, se ami bele foti uluk kestaun basiku sira ne'ebe Timor-Leste tenta dadaun hodi hatoman-an ba. Ida, RDTL lista ona nudar pais sub-dezenvolidu entre paises sub-dezenvolidu 49 iha mundu ho karateristika ne'ebe defini husi *Committee for Development Policy* ONU nian. Karateristika sira nee mak: ida, rendementu ekonomika (GNP/GDP) kiik; Rua, Vulnerabilidade ekonomika ne'ebe inkluidu indikadores sira hanesan choques naturais, choques comercio, fasil hetan choques (*exposure to shocks*), ezemplu mak hanesan desastre naturais, ekonomia ne'ebe kiik-oan, no ekonomia remotas. Karateristika tolu mak kompostu husi indikador nutrisaun, saude, rejistrasaun iha eskola no alfabetizasaun, hotu ne'e hanaran "Human Assets Weakness." Human Asset Weakness ne'e, la seluk, la let mak indikador dezenvolvimentu sosial ou dezenvolvimentu umana.

Ami klaramente hakarak tebes atu hatoman-an ho Committee for Development Policy ONU nian ne'e, kona oinsa mak sira hamosu kriteriu sira ne'e no oinsa sira nia asesmentu oras ne'e dadaun, ne'ebe nasaun sira hasoru dadaun krise ekonomia no finansieru. Ita foti deit ezemplu, nasaun sira hanesan Iceland, Grecia, USA no agora nee dadaun mak Republika Irlandez, Portugal, Espana katak kuaze Europa tomak hasoru krise. Nasaun sira ne'e hotu sei luta ba sira nia sobrevivensia, luta hela atu kontinua eksiste iha merkadu finansieru nian. Tuir notisias, Portugal karik sei tuir tan ain fatin Iceland no Grecia no sei hetan krise ne'ebe seriu liu, *economic rescension*, kuaze kompania 1,200 ba leten ona mak taka-odamatan no sira TRABALHADOR sira protest loron ba loron. Situasaun ne'e dita mai ita katak nasaun sira ne'ebe nia ekonomia altamente globalizadu no nakloke makaas ba merkadu finansieru mak la sustentavel no hatudu risku no choques boot liu no afeta makaas liu ba ema barak nia moris umana. Situasaun ne'e halo ita hanoin katak afinal crescimento ekonomika ne'e mos iha nia limitasaun.

Kestaun daruak, mak LDCs nia indikador ne'ebe entre indikadores dezenvolvimentu barak mak ita uza iha mundu ne'e nu'dar sasukat ba progresu no regresu nasaun ida nian. Hanesan mos nasaun barak,

¹ Antero Benedito da Silva, Diretor of Peace and Conflict Studies Institute, Faculdade Siensia Sosial, Universidade Nacional de Timor-Lorosae, ne'ebe nu'dar mos Facal Point Nasional ba LDCs nian.

² FONGTIL

Timor-Leste mos dezenvolve ninia sasukat nasional rasik ne'ebe inkorpora mos MDGs, ami mos aprende dadaun GNH (Gross National Happiness) Bhutan nian, no indikator LDCs nian, ne'ebe inklundu mos Programa Asaun Bruselas nian (BPoAs) nian.

Istoria Suksesu no dezafios

Ami hakarak temi hotu kedan BPoA nia objektivu sira iha nee, ba dahuluk, hodi tulun ami hatoo tan objektivu balun karik mak Governu RDTL observa ona tanba universalidade indicadores sira ne'e. Objektivu BPoA hitu mak: haburas modelu politika popular ida; Boa governansia iha nivel nasional no internasional; hari kapasidade umana no institusional; hari kapasidade produtivu hodi globalizasaun bele lao mos ba LDCs; hametin knar komersiu iha dezenvolvimentu; reduz vulnerabilidade no proteza meo-ambiente; mobiliza rikursu finansieru; Ami sei la halo esplikaun detailas ba planu de asaun sira nee, maibe sei tenta hatoo informasaun jeral sira ne'ebe relaciona ho LDCs ninian indikator no ikus liu ami sei lori ba diskusaun pratika demokrasia iha Timor-Leste, ne'ebe mos ami observa nudar kestaun sabe ida iha forum ida ne'e.

Ida, Human Assets Index; RDTL adopta politika edukasaun basiku universal ba ema hotu ne'ebe admite Timor oan sira husi kiik too ferik katuas, sira hotu ba eskola, ho nivel registu nian iha eskola primaria as to'o 82.7 pursentu tinan letivu 2008/9. Agora dadaun Estado hari ona eskola 1,271 iha teritoria tomak, ne'ebe kompostu husi 1,012 eskola primaria, 168 eskolas pre-sekundariu, no 91 eskolas sekundariu (73 eskola jeneral no 19 eskola teknika). Governu RDTL projeta katak to'o tinan 2025, labarik Timor oan sira hotu sei kompleta eskola basiku obrigatoria tinan sia nian. Ho opoiu Governu Cubano, Governu RDTL gradua ona ema hamutuk nain 60,000 resin husi eskola adultu, numeru total pelumenos 300,000 analfabetu, ne'ebe kompostu husi kuaze 50 pursentu populasaun adultu nasaun nian. Suksesu ne'e hetan depois de Timor-Leste halo kampane intensivu iha tinan hat resin nia laran. Iha ensino superior RDTL hari ona Universidade Nasional ida, admite universidade privadu tolu, no instituisaun hanorin nian tolu tan ne'ebe ofere se kursu iha area formasaun professores, trainamentu komputadores no siensia basiku sira seluk. Unika Universidade Nasional Timor-Lorosa'e tenki habo'ot ninian kapasidade atu bele simu graduadu kolejiu nian ne'ebe ninian total tinan hirak ikus kuaze 10,000 resin no sei progressivamente aumenta tinan ba tinan. Timor oan sira hamutuk liu 2000 mak estuda iha Indonesia, Governu parseiru sira barak mos mak ofere se bolsu estudu ba pos-graduasaun no lisensiatura ba nasaun sira hanesan Irlandia Republika, Nova Zelandia, Australia, Hawaii, Portugal no nasaun Asia balun tinan-tinan.

Sistema edukasaun Timor nian maske nune'e tenki sujeitu ba transformasaun permanente hodi bele responde ba nesesidade nasaun no povu nian. Transformasaun ne'e inklundu iha nivel politika katak edukasaun tenki ba ema hotu iha nivel hot-hotu. Governu tenki difini filosofia edukasaun ida mak korekta, hosi eduka ema sai sientifiku, umana, ida badaen naton, hodi sai ema mak ukun-rasik-an. Konserteza se ami nia sistema diak no consegue kria surplus umanu ami mos bele exporta ami nian rikursu umanu, ne'ebe iha kapasidade, badaen no dignidade aas atu la sai atan ba kompania iha nasaun riku sira hanesan oras ne'e dadaun ami nia jovem sira ba iha Europa no Korea de Sul.

Orsamentu Jeral Estado nian tinan 2010 hatudu katak alokasaun orsamentu reduz ba 8.9 pursentu. Situasaun ne'e mosu tamba Governu atual halo kompromisu hari *Mega Power plant energy*, ho ambisaun atu kria industria iha Timor-Leste nu'dar dalan ba progressu, tuir modelu modernizasaun Europeu nian. Orsamentu menus tanba mos, Governu aloka osan maka'as ba rekoperasaun sosial no politika depois de krise 2006 no aloka fundu asistensia sosial ba veteranos luta nian. Dala ida tan, povu timor la 100 pursentu konkorda ho politika sira ne'e hotu, ne'ebe defaktu minimiza investimentu iha setor dezenvolvimentu sosial ne'ebe sustentavel. Oposisaun sira ne'e mos iha rasaun no responsavel. Nasaun sira ne'ebe halo suksesu, mak Singapura no Cuba, por ezemplu, tamba sira halo investimentu maka'as ba dezenvolvimentu sosial umanu, laos tamba sira riku iha rikursu naturais. Ezemplu seluk mak nasaun Japaun nian ne'ebe estagnadu ona iha nivel dezenvolvimentu fisika industrial no sira hahu muda paradigma ba dezenvolvimentu iha area seguransa umana. Tamba ne'e, kualker politika ne'ebe Governu RDTL halo mak implika alokasaun orsamentu menus ba sektor edukasaun, klaramente regresu ida ne'ebe Timor-Leste esperiensia. Universalmente aseitavel katak nasaun ida atu bele sustenta ninia performansia sosial iha setor edukasaun,

nia presiza pelumenos 20 porsentu husi Orsamentu Jeral Estadu kada tinan. Timor-Leste foin mak hahu dezentolve no nasaun ida ne'e presiza liu dezentolvimentu umanu atu aseguru partisipasaun popular ho matenek ba prosesu hot-hotu nasaun nian.

Iha setor saude, RDTL halo mos kooperasaun ho Governu Cubano, maske Estados Unidos da Amerika halo blokeia ekonomia injusta kontra nasaun Caribia ne'e durante tinan 50 resin ona. Timor oan sira 700 resin mak estuda mediku no area seluk relasiona ho saude iha Cuba no estudante besik 300 mak eskola dadaun iha Timor-Leste, ne'ebe mediku Cubano sira mak supervisa mos. Estudante mediku 18 mak remata ona sira nia kursu fulan Setembru 2010 no hahu servisu ona iha Timor-Leste no estudante 400 resin mak tuir pratika no moris iha sosiedade nia laran hahu husi Dezembru 2010 too Marsu 2011. Ho populasaun 1.2m, Timor-Leste espera atu koloka mediku ida kada ema nain 1000 antes tinan 2015. Mas ami talves hasoru problema ida. Timor nu'dar zona estratejiku ba nasaun Asia no Pasifiku. Espalla ona notisia iha Timor katak instituisaun saude balun iha Australia hakarak hari Hospital privadu iha edifisiu ospital militar antigu nian. Maske ami seidauk bele justika kazu ne'e, mas agente sira iha Australia fo apoiu bolsu estudu ba Timor oan balun hodi foti doutoramentu kona jestaun ospital nian iha Darwin no Sdney, no ami nia Ministro Saude Nelson Martins atual, derepent, hetan titulu Professor husi Universidade Sydney. Ami hein katak, grupu interese sira iha Australia sei la-esplora oportunidade oi-tuan sira ne'e, hanesan sira halo ona ba rikursu minarai Timor nian durante okupasaun Indonesia nian. Hafoin, orsamentu estadu ba saude mos tun fali husi 9 porsentu ba mais ou menos 6 porsentu kada tinan, durante tinan tolu ikus nee.

Daruak, indikator ekonomika sira mak rendementu ne'ebe kiik no vulnerabilidade ekonomika, nu'dar sasukat ba status LDCs nian. Felizmente, Timorenses sira konsegue evita debe osan no orsamentu estadu nian hotu mai husi ami nia rikursu rasik desde tinan 2007. Montante Orsamentu Estadu kada tinan nian mak US\$500m resin ba leten durante periodu tinan tolu ikus ne'e no total ne'e sei kontinua aumenta kada tinan, tanba Timor-Leste hetan benefisiu ona husi eksploitasaun rikursu minarai iha tasi Timor nian. Tinan hat ikus ne'e, Governu RDTL simu mais ou menos US\$1billiaun kada tinan no 3 porsentu husi rikusoil petroleum nian, ho montante 500m nune'e kada tinan, usa hotu ba Orsamentu Estadu. Nune'e kuaze 90 porsentu Orsamentu Jeral de estadu depende liu ba Fundu Petroliferu. Petroleu mos sai ona nu'dar faktor primaria ne'ebe kontribui ba kresimentu ekonomika, ne'ebe tinan 2009 to'o kuaze 6-8 porsentu. GDP per kapita Non-Petroliferu tinan 2008 mak US\$462 no figura ne'e karik aumenta ona tanba osan ne'ebe hetan husi tasi Timor nian. Maske nune'e, Timor-Leste kontinua infrenta problema seriu iha setor petroliferu nian tan rasaun balun tuir mai ne'e. Ida, Timor-Leste depende liu ba Australia no kompania multinasional sira iha area rikursu umanu, fator produsaun no kapital ba esplorasau, eksploitasaun, prosesa no faan produtu ba merkadu nian. Rua, Timor-Leste estabiliza kooperasaun besik ho partikular liu Governu Norwegia, hodi dezentolve rikursu umanu ne'ebe nesesita iha setor industria petroliferu maske Governu atual, desafia kooperasaun ne'e. Governu RDTL haruka mos ona klosan Timor oan sira hodi estuda geolojia no area sira ne'ebe relasiona ho industria petroliferu iha Universidade sira iha Indonesia no nasaun seluk, maibe sei lori tinan balun atu sira bele remata kursu no hetan badaen ne'ebe nesesariu antes sira finalmente kontribui ba projeitu nee. Tolu, Governu diskuti dadaun kompania Minarai Estadu ida no hein katak sei estabiliza kompanie ne'e iha futuru besik ne'e, hodi inisia esplorasau no eksploitasaun minarai no gas iha zona sira ne'ebe konsidera tama iha area juridika Timor nian. Ida nee, posivelmente involve mos konstrusaun ho Sociedade Mista (Joint Venture) refinaria mina nian ida iha nasaun laran nu'dar base hodi dezentolve peritu-matenek no bele mos hetan independensia oi-tuan iha area minarai no gas nian. Hat, Australia no kompania multi-nasional sira hori-uluk kedas no sei kontinua sai bareiras ba ami nia independensia no bareiras ba dezentolvimentu iha zonas sira ne'ebe konsidera tama iha area soberania, to'o konvensaun internasional sira kona linea maritima hetan observasaun alta no implementa lolos-ona. Konflitu intransigenti kontinua kona eksploitasaun iha bloku minarai ida hanaran Greater sunrise, ne'ebe Australia hakarak kanaliza kadoras ba iha Darwin-Australia no Timor-Leste defende atu dada kadoras mai Timor-Leste ne'ebe Timor konsidera sai kazu justisa ekonomia. Kompania minarai Australia ida naran Woodside simplesmente propoin solusaun seluk hodi hari LNG namlele iha tasi-laran, teknolojia ida ne'ebe seidauk eksiste iha mundu ne'e, ho folin ne'ebe konserteza makaas liu. Debate tan ne'e sei kontinua!

Ekonomia Timor nian maske nune'e, la bele depende deit ba industria gas no minarai. Iha nasaun barak ne'ebe produz minarai no gas sai malisan ida ba sira. Prof. Tim Anderson husi Universidade Sdney, pur ezemplu argumenta katak industria petroliferu kria-fali *sanarai-bani-ben nian* (honey pot) hodi hamosu fali korupsiun no violasaun direitu ema nian. Iha Timor-Leste, ita espera katak 'industria petroliferu no gas sei sai nu'dar dalam ba dezvoltimentu iha area seluk' iha futuru. Eksiste mos setores sira seluk hanesan agrikultura, turismu no finansieru domestika. Ministeriu Agrikultura Governu atual tenta adopta ona revolusaun verde hodi dezvoltolve setor agrikultura, maibe aproximasaun ida ne'e sai problematiku ona iha nasaun barak iha mundu tanba, tantu nasaun ou povu nasaun ne'e nian sei laiha kontrola ba teknolojia no agrikultores sira tan ne'e too ikus fo sira nia vida tomak servisu ba poder ekonomia sira ne'ebe kontrola produsaun adubu, fini no makina agrikultura nian. Revolusaun verde oho hotu fini lokal povu nian ne'ebe habitua ona ho klima lokal no troka fali ho fini hibrida ne'ebe fasil hetan moras no folin karun. Agrikultores nasaun nian sei sosa fini hibrida durante sira nia vida tomak hodi kontribui ba kausa seluk, osan semo ba nasaun seluk, ou *capital flight*. Ba sa, povu fatin barak iha mundu horinebe kedas buka hela ona dalam alternativu, dalam ne'ebe uza menus enerjia konvensional hodi produz aihan makaas.

Governu halo previsaun ida katak tinan 2030, Timor-Leste sei hetan auto-sufisiensia iha aihan, no sei produz produtus agrikultura oi-oin ba merkadu inkluidu "aihan basiku sira, aifuan, modo, no aihan sira seluk, produtus sira mai husi aihoris no produtus ikan nian." Previsaun ida ne'e irealista, se ami la hola dalam mak los. Ami fo ezemplu balun. Iha knua ida naran Hera lokaliza besik sidade Dili, kapital Timor nian. Durante tinan sanulu ikus ne'e sira mak sai supplier primaria ba modo-mutin ba populasaun iha Dili. Oras ne'e dadaun Governu hari ona Mega Power plan iha zona ne'e. Tinan hirak mai oin, Governu sei hari projetu rua: baze militar naval nian no Universidade Nasional. Projetu sira hanesan ne'e sei radikalmente reduz luan rai agrikultur katak mos reduz kapasidade produsaun ami nian. Klima Timor mos muda dadaun. Governu, karik la inklui fator sira ne'e nu'dar rekerementu ba sira nia previsaun.

Iha ami nia opiniaun, Timor-Leste la presiza teoria Revolusaun Verde tomak deit, no la presiza iha ambisaun ida atu exporta ba nasaun seluk, maibe Timor presiza Revolusaun Metan Timor nian (black Timorese revolution) iha sistema agrikultura, sistema ida ne'ebe tenki abut mai husi tradisaun agrikultura Timor nian, tradisaun ida ne'ebe teknolojia alternativu povu nian sai nesesidade hodi produz aihan, laos ba exporta maibe ba auto-sufisiensia, hodi fo han ami nia familia sira no povu uluk, ida ne'e mak tenki sai ami nia prioridade. Se Governu simu konsellu ne'ebe sala, sei infelizmente falla iha politika ne'e.

Setor turismu lokal sai area seluk ne'ebe sei importante hodi tulun sirkulasaun osan iha nasaun laran iha futuru, maibe dezvoltimentu rikursu umanu iha area ne'e no fator kontribuidor sira hanesan infrastrutura amizade ba povu no ambiente sei presiza hari. Pontu ikus liu ami hakarak temi mak setor finansa. Timor iha reserva finansieru ne'ebe rai iha obrigasaun ou *bonds* Estado Amerika nian. Nu'dar interese tempu naruk nasaun nian, no konsidera mos krise finansieru iha sistema mundu kapitalista, Timor-Leste sei adopta politika diversifikasaun obrigasaun estadu nian, atu bele investe mos iha moeda-osan nasaun seluk nian. Karik ida ne'e involve mos investimentu direta bilateral iha empresa estadu nian. Governu Timor konsidera opsaun stock market, maibe tamba krise finansieru opsaun ne'e sei hetan difikuldade iha implementasaun.

Timor iha potencia mos ba hakiak mikro-kreditu sira ne'ebe komunidad mak inisia iha nasaun laran tomak, ne'ebe halao knar boot tebes iha ekonomia familiar. Aumenta ba ida nee, kleur ona desde Governu anteriores, iha ona sugestaun atu investe ba konstrusaun sistema finansial inovativu ida hodi dudu partisipasaun aktiva povu nian iha area ekonomia. Oras nee dadaun, eksiste ona banku estranjeiru tolu ne'ebe mak kontrola aktividade finansieru hanesan rai osan, kreditu no interkambiu iha Timor. Sistema ida ne'e mosu nudar parte integrante ba politika kooperasaun bilateral maibe mos kestaun neo-liberal durante periodu transisaun ONU nian. Eksiste mos dezvoltimentu setor privadu nasional ne'ebe nurak tebes. Kompania konstrusaun Timor sira kompete projeitu sira finansia husi estadu no dehan katak sira hetan tusan barak iha banku estranjeiru sira ne'ebe ami temi ona ohin. Parlamentu halo hela inspeksaun ba sira. Ida ne'e hatudu mos katak Timor-Leste presiza visaun foun hodi rekonstrui ami nia sistema finansieru ida ne'ebe afavor ekonomia popular no tau limita ba osan semo sai husi Timor-Leste ba nasaun seluk, maske konsidera interkambiu moeda nu'dar kestaun stratejiku. Iha tinan hirak mai, Timor sei kontinua uza moeda

Amerika nian, tamba kapasidade sosa ami nia povu nian sei menos no produsaun interna seidak maka'as hodi halo balansu ba sasan importa sira.

Datolu, Politika dezentvolvimentu Popular (People Centred Policy of Development) nesesita pratika demokrasia foun ida, tipu demokrasia popular ida ne'e bele lori demokrasia fila ba ninia abut lolos nian: poder iha povu nia liman. Pratika demokrasia foun ida ne'e fundamentalmente sei choque malu ho tipu demokrasia no natureza estadu neo-liberal ne'ebe mundu pratika ohin lora. RDTL adopta tiha ona demokrasia multi-partidaria ne'ebe inisialmente dezentvolve mos iha Europa no Amerika norte, ne'ebe sai ona nu'dar modelu ida atu ema mundu rai-klaran hotu tuir. Maibe, realidade mak estadu nasional sira babain depende ba konsellu husi perseru internasional sira ne'ebe povu nunka hili. Instituisaun Finansa Internasional sira ne'e halo advokasia ba politika no aproximasaun *top down* ba dezentvolvimentu. RDTL, durante periodu tinan sanulu ikus ne'e iha ONU no IFI sira nia okos, la ses mos husi paradigma *top down* ou pratika estadu korporatizmu ida nee. Frakeza seluk demokrasia multi-partidaria tipu ida ne'e mak laiha sustentabilidade iha politika estadu nian. Maske ejiste politika sira ne'ebe los, dezentvolve husi rejime politika anteriores ne'ebe komprometidu ba kestaun sira hanesan justisa sosial no akuntabilidade publiku maibe dalabarak laiha garantia kontinuasaun politika sira ne'e tanba mudansa rejime implika ba politika sira ne'e. Ida nee esperiensa ida ne'ebe universalmente akontese iha sistema demokrasia multi-partidaria. Oinsa mka nasaun ida ne'ebe pratika demokrasia multi-partidaria bele aseguru politika iha areas prioridades nasional sira la bele kompromisu fali objektivu politika tempu badak sira no interese nasaun leur sira nian?

Maske ONU no Governu Timor-Leste halo tentativas konsulta povu lokal bain-hira dezentvolve Planu Dezentvolvimentu Nasional tinan 2001/2, tempu ne'eba Timor-Leste sei lao iha periodu transitoria. Foin lalais nee, Governu atual halo mos konsultasaun distrital hodi dezentvolve Planu Estratejiku Dezentvolvimentu nian. Iha nasaun ida ne'ebe kuaze 50 persentu ninia povu la hatene hakerek, esforsu sira ne'e sei dook liu husi planu dezentvolvimentu popular ida ne'ebe lolos nian. Maske planu ne'e importante, kritika sugere katak Planu Dezentvolvimentu Estratejiku nasaun nian ne'ebe Primeiru Ministru Xanana Gusmao halo foin lalais ne'e sai deit nu'dar dalan ida ba Governu hodi hetan lejitimidade foun ruma ba Governu ne'ebe durante ne'e hasoru kritika fenomena mal-governansia. Ida ne'e justa tanba rejime politika ne'ebe deit tenki hare fila fali ninia lejitimidade regularmente hodi aseguru katak rejime ne'e laos lidera iha rai fuik maran, ho bibi lubun boot. Governu atual tenta esplora mos estratejia dezentralizasaun, ne'e inkluidu mos re-estruturasaun governu lokal, maibe tanba laiha estudu ne'ebe profundu ba asuntu ne'e, objektivu ne'e sei la too iha pelemenus tinan lima mai oin. Buat ne'ebe posivel karik mak artikulasau demokrasia liu husi hakbiit movimentu sosial no estrutura base sira no promove dezentvolvimentu husi karaik (dezentvolvimento rais), ho grass root democracy, ne'ebe FRETILIN dezentvolve ona iha Bases de Apoio tinan 1976-78. Module ida ne'e, Governu Xinese tenta dezentvolve ona iha dekada rua ikus ne'e, no Cuba tenta halo reforma dadaun ba diresaun ida ne'e.

Transformasaun Sektor Movimentu Sosial

Tanba intervensaun humanitaria tinan 1999, numeru ONG sira aumenta makaas tebes no halo knar importante dezentvolvimentu iha setor hotu, maske sira mos halakon tiha knar kritiku organizesaun resistensia nian ne'ebe politika liu duke NGO sira neebe orienta deit ba projeitu sira. Tinan 2010, FONGTIL (Forum Organizesaun Nao Governamentais Timor-Leste) rejistu ona 434 NGO aktivu kompostu husi 70 INGOs no 36 NNGO. Maibe ONG sira ne'e buras iha modu hanesan mos Industria Umanitaria neebe runranga iha nasaun sul sira, ne'ebe dalabarak kria dependensia duke independensia nasional, hanesan dadaun kazu Afganistaun no Haiti oras ne'e. Hanesan mos nasaun barak, Timor-Leste konese mos terminolojia sira hanesan, DONGO (Donor's NGOs). Observasaun validu hateten katak bain-hira organizesaun barak mak reklama involve-an halo buat ruma ba povu no dalaruma iha espiritu kompetitivu ba fundu no ba apoiu sira ikus mai la kontribui buat ida, maibe tenta deit sustenta sira nia relasaun patraun no kliente entre donor no sira ne'ebe simu fundu, ate too ba pontu ida, sira importa modelu dezentvolvimentu sira ne'ebe la relevante ba kontekstu lokal. Tinan 2006, unidade militar ida revolta iha Forsa Armada Timor-Leste nia laran kauza krise politika no sosial iha nasaun laran ne'ebe halo RDTL paralelu ba estadu falhadu. ONU nia istoria suksesu reduz husi *hero* ba zero. Tinan rua ikus nee, Governu

RDTL aloka ona osan estadu ne'ebe iha tinan 2010 mesak deit hamutuk US\$2 ba CSO sira hodi partisipa iha dezvoltamentu. Iha ona proposta 250 husi CSO sira ne'ebe halo servisu iha area oi-oin hanesan: hari kapasidade, agrikultura, saude basiku, hakbiit komidade no projeitu buka rendementu ekonomika sira. Maibe intervensaun estado ne'e simplesmente lori terminolojia foun ba NGO sira. Kritika sosiedade hateten katak ONG sira Timor nian muda ona husi DONGO ba GONGO (Government NGOs), no sai orienta makaas liu tan ba projeitu duke politika no aktivu involve-an iha transformasaun permanente sosiedade ba objektivu resistensia nian ba daruak, libertasaun total povu maubere liu husi promosaun independensia ekonomika no politika. Maske osan ne'ebe ONG sira simu ne'e povu Timor nian, intervebsaun Governu nian ne'e mos lori tan debate foun ona identidade NGO no sosiedade sivil sira no sira nia agenda futuru iha sosiedade nia laran. Esperiensia sira seluk ne'ebe Timor-Leste iha mak, projetu humanitaria implika ba despolitizasaun CSOs, no dalabarak parseru internasional sira halo advokasia ba knar NGO ne'ebe *apolitika* (katak NGO tenki netral), ne'e inklui mos anti partido politika revolusionariu iha parte ida, no promove demokrasia iha parte seluk. Ida ne'e posisaun paradoks, nesesitya hakaas-an iha ne'e hodi bele komprende ideolojia parseru internasional sira nee, iha kontekstu Timor-Leste nian. Partido politika sira laos NGO, no NGO sira laos mos partido politika, maibe tenki iha buat ruma ne'ebe komun, ezemplu mak kaer espirtu luta nian no valores fundamental sira hanesan justisa sosial, demokrasia popular no seluk-seluk tan hodi moris nafatin nu'dar makina iha konjuntura politika ohin loron nian hodi buka formatu ida ba sosiedade ida humana ne'ebe justa, solidariu no hakmatek. Tan nee, despolitizasaun nee kontra-produktivu. FONGTIL infrenta krise seluk tan mak kazu korupsisaun. HASATIL (Haburas Agrikultura Sustentavel Timor-Leste) nu'dar sumrina ONG sira ne'ebe servisu ba agrikultura hetan ameasa atu taka, tamba korupsisaun iha nivel estrutura ne'ebe posivelmente halo kolusaun ho auditor externa, no kazu ne'e laduak hetan solusaun to'ohin loron. FONGTIL mos presiza jetsaun organizesaun sira ne'ebe tuir kanal informal sira mak hetan krise tan korupsisaun no mal-jestaun inkluidu Fundacao Fatu Sinai (FFS) iha Oekusi, Rede Feto, no talvez lista naruk liu tan se ita hakarak halo investigasaun seriu ba sektor CSOs. Uniaun Matan at sira nian hasoru mos problema hanesan, tamba direktor ekzekutivu matan diak ida mak hetan alegasaun komite korupsisaun, no Board Organizesaun ne'e hola ona auditoria interna no consegue lori ona kazu ne'e ba Komisaun Anti-Korupsi saun no Provedoria Direitu Umanu, hodi admite organizesaun ne'e kontinua ba matan sira nia nesesitya. Nune'e, ejiste nesesitya re-konstrusaun identidade NGO sira nian, no CSOs sira hotu hodi kaer knar foun sai objektivu primaria ba FONGTIL iha tempu badak. Dalan seluk, sosiedade rasik mak hamosu alternativu, ezemplu mak Uniaun Agrikultura Ermera (UNAER), hodi sira rasik mak dezvoltolve movimentu iha base duke, intelektual sira uza povu nia naran hodi hamosu grupu ne'ebe ikus mai dependenti ba fundu humanitaria husi nasaun norte sira. Kestaun LDCs sei sai parte ba agenda FONGTIL no movimentu popular no sosial sira hotu iha Timor-Leste. Dala ida tan, ami koaliala hodi nasaun kiik-oan ida ho populasaun jovem 1.2m ne'ebe mak hasoru problema balun hanesan mos nasaun barak iha mundu ohin loron.

Sei halo saida?

Ideas sira hanesan transformasaun permanente ou revolusaun permanente iha sistema demokrasia no sidadaun ne'ebe aktiva ita bele hare iha movimentu sosial no komidade baze sira kontinua sai dalan potensiais atu ita bele halo buat ruma. Forum LDCs Asia nian nu'dar espasu foun ida mos mak Timor oan sira bele aproveita hodi partisipa iha diskursu rejional nian, no ami mos konsiente ba dedikasaun kolektivu ba povu no nasaun hotu ne'ebe representa iha nee atu bele servisu hamutuk ba ita hotu nia objektivu komun. Partisipasaun popular nesesitya nivel alfabetizasaun ida ne'ebe alta, no povu tenki komprende konseitu basika sira hanesan estado, hari estadu, dezvoltamentu no sira nia kompleksidade iha nivel nasional no internasional. Ba Timor-Leste, luta halakon analfabetismu, ne'ebe kria diskriminasaun sosial, sai nudar komitmentu nasional nian no ita hein katak tinan 2020, hanesa Governu RDTL hateten katak Timor-Leste sei libre husi analfabetismu. Kampane alfabetizasaun mos nu'dar prosesu politika ida no ita tenki uza dalan ne'e hodi aumenta konesementu politika ami nia povu hodi bele partisipa diak liu iha dezvoltamentu no prosesu hari nasaun nian.

Bain-hira ami restaura ami nia independensia tinan 2002, ami kuaze lakon tiha hotu: lakon ami nia lideres prinsipais sira, pensador independensia nian. Sira nia numeru oras ne'e menus husi nain lima, husi lideres orijinal sira neebe konsegu moris ohin lora, no sira hotu kuaze lakleur tan lakon fuuk hotu, no sei mate, maibe luta tenki kontinua. Ami nia nai-ulun boot sira imajina no esperimenta ona Estado Sosialista Alternativu ida iha base da resistensia tinan 1976-1978, neebe kontraditoria ba sistema dominante, estado korporatizmu no estadu kolonial ho neo kolonial nian. Ohin lora, ami hare katak iha nesesidade atu re-konstrui no re-afirma ami nia luta iha nivel ideas, esforsu ne'e inkluidu halo pergunta ba natureza estado no modelu dezvoltimentu husi teoria dominante kapitalizmu liberal nian. Ami tanba ne'e hare nesesidade ida boot tebes atu hakbiit ami nia lider futuru sira iha frenti hot-hotu hodi aumenta sira nia kapasidade intelektual no badaen iha luta foun nee, batalla permanente das ideas (the permanent battle of ideas).

Timor-Leste nia komitmentu no kultura nasional mak solidariu ba luta povu nasaun sira ne'ebe ba liberdade. Ida nee obrigrasaun historika nu'dar ema umanu ne'ebe iha etapa ida iha ami nia historia sai nudar povu oprimidu, povu ne'ebe ema hanehan, no obrigrasaun historika ida ne'ebe mos konsagra ona iha Constituisaun da Republika de RDTL no ami nia musika nasional, Patria, Patria. Tanba ne'e, ami gosta tebetes atu aumenta intensidade relasaun solidariedade entre povu no nasaun sira. Nune'e, se lora ida, karik Timor-Leste graduadu tuir standard ONU nian nudar nasaun sub-dezenvolvidu, ami hein atu hametin solidariedade entre nasaun sul sira (south south cooperation) no internasionizmu popular sai ahi ne'ebe lakan ba nafatin hodi promove dame iha mundu rai-klaran.

Bibliografia

RDTL 2010, *Millennium Development Goals*, Timor-Leste.

Lao Hamutuk 2009, 'Timor-Leste Human Development Unchanged in 2007', 9 October.

LDC Watch 2011, *Fighting for Justice, Peace and Human Rights of the Least Developed Countries*,

http://www.ldcwatch.org/index.php?option=com_jdownloads&Itemid=0&task=finish&cid=33&catid=3&lang=en, viewed 1 May 2012.

RDTL 2010, *On Road to Peace and Prosperity*, Office of the Prime Minister, Dili.

Mario de Queiroz 2010, 'East Timor Extends a Hand to Troubled Portugal', *Timor-Post*, 18 November.

Mario da Silva Carvalho 2010, *Konversa Informal*, Outubro, Bangkok.

Mafalda, Gusmao 2011, *Konversa Informal*, Dezembru, Dili.